



***Komunikadu Imprensa***

***Tribunál Distritál Dili***

**07 Abril 2016**

**Tribunál aplika pena prizaun kontribui ba prevensaun krime**

Iha 5 Abril 2016, Tribunál Distritál Dili prejide leitura akordaun no kondena arguidu AC no ACM tanba provadu prátika krime hasoru lezadu JS no LP, iha Distritu Likísa.

Ministériu Públiku akuza arguidu AC nu'udar autór materiál no arguidu ACM nu'udar ko-autór ba krime omisídiu tuir artigu 138 ho forma tentativa iha artigu 23 no 24 Kódigu Penál kona-ba tentativa no tentativa nia punibilidade hasoru lezadu JS. Aleinde ne'e arguidu AC mós alega prátika krime ofensa grave hasoru lezadu LP, tuir artigu 146 letra (a) no (b).

Tribunál prova katak iha 9 Agostu 2015, arguidu ACM hodi alu baku iha lezadu JS nia ain, kauza lezadu monu ba rai. Depoisdé lezadu monu iha rai arguidu AC ho katana taa iha lezadu JS nia ain-tuban sorin karuk, liman sorin loos, ulun-fatuk, kelen sorin karuk, hasan sorin karuk no liman fuan. Aktu ne'e rezulta lezadu JS kanek todan iha ain-tuban, tohar iha liman parte loos, kanek iha ulun, kanek iha kelen sorin karuk, kanek boot iha hasan sorin karuk no liman fuan kotu.

“JSMP apresia desizaun ne'e tanba iha efeitu prevensaun jerál no espesial ba comunidade no espera katak elementu comunidade sira seluk bele aprende hosi esperensia kazu ida ne'e atu evita uza violénsia hodi rezolve sira nia problema iha sosiedade,” dehan Luis de Oliveira Sampaio, Diretór Ezekutivu JSMP.

JSMP hanoin katak lezadu sira merese atu hetan indemnizasaun husi arguidu sira, tanba lezadu JS nia kondisaun liman tohar no labele kaer servisu hanesan normal.

Tribunál mós prova katak arguidu AC taa lezadu LP nia liman-tanen sorin loos bainhira lezadu tenta salva lezadu JS. Aktu ne'e rezulta kanek todan iha lezadu LP nia liman tanen no labele kaer servisu hanesan normal.

JSMP prezume katak dalabarak comunidade iha tendénsia abitua uza meius violénsia hodi rezolve konfliktu iha comunidade. Tendénsia sira ne'e mak dalabarak da'et ba uma-laran no membru família sira mós abitua atu uza aprosimasaun violentu hodi kontrola membru família

sira seluk hanesan, violénsia doméstika no abuzu hasoru labarik sira. Tanba ne'e JSMP hanoin desizaun iha kazu ne'e apropriadu atu evita krime hanesan akontese iha comunidade.

Depoisde avalia faktus provadu sira ne'ebé produz durante julgamentu no sirkunstánsia hotu-hotu ne'ebé asociadu iha krime ne'e, tribunál konklui prosesu ne'e no kondena arguidu ACM ho pena prizaun tinan 12 fulan 6, ba arguidu AC tribunál kondena ho pena prizaun tinan 5 fulan 6.

Kazu ne'e rejistu iha tribunál ho Nuc. 0110/15.LILIQ. Julgamentu ba leitura akordaun ne'e prejide hosi Dra. Edite Palmira dos Reis (representa juis koleтиву). Enkuantu ministériu públiku representa hosi Dr. Napoleão Soares da Silva no arguidu sira hetan defeza hosi Dra. Olga Barreto Nunes husi eskritóriu defensória Pública.

Atu hetan informasaun kle'an liután favór kontaktu:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)